



Dizoloiñ Foeon ar Glenan

D'ar 7, d'an 8, d'ar 14, d'ar 15 pe d'an 21 a viz Ebrel e vo aozet ur veaj eus Konkerne betek an inizi Glenan da vont da welout Foeon ar Glenan, plantennoù a gresk, er bed-holl, war beder enezenn er Glenan hepken. Ambrouget e vo ar weladenn gant daou arbennigour : Roland MOGN ha Patrick DREAN. An displegadurioù ganto a vo e **brezhoneg hepken**, e KLT hag e Gwenedeg.

Amresis e chom deziad ar veaj en abeg d'an amzer ha da stad ar mor hag en abeg ma 'z eo damzistabil a vloaz da vloaz ar mareoù ma teu ar foeon e bleuñv. Ouzhpenn-se, o bleuniadur a bad teir sizhun hepken. An inizi Glenan zo anezho pemp enezenn vras : **an Dorchenn, al Leue, an Dreneg, al Loc'h ha Sant Nikolaz** ha, tro-dro, un tropellad enezennigoù ha reier bihan.

Dizoloet e voe Foeon ar Glenan gant BONNEMAISON, apotiker e Kemper, e 1804 ha dedennet bras e voe al louzawourien gant ar spesad-se, a zo damheñvel ouzh ur seurtad foeon a gresk er Spagn. Gwall-fonnus e oant war Enez Sant Nikolaz e deroù an 20vet Kantved. Niver ar plant a zigreskas da c'houde, dreist-holl dre faot an douristed, ken aes ma oa dilestrañ war an enezenn. Betek deroù ar bloavezhioù 1970 e voe kutuilhet bleunioù ha tennet bulbennoù forzh pegement. Met ar plant-se ne greskont ket mat e-maez ar Glenan. Ober a reont delioù met ne reont ket bleunioù. Neuze, n'eus nemet ul lec'h er bed ma vez tro d'o gwelout e bleuñv : Enez Sant Nikolaz. An teir enezenn all ma kreskont ivez zo difennet rik mont warno.

Diwar kentod an SEPNB (Société pour l'Étude et la Protection de la Nature en Bretagne, Kevredad Studiañ ha Gwareziñ an Natur e Breizh) anvet bremañ "Bretagne Vivante SEPNB" "Breizh Vev, KSGwNB" e voe roet ar statud a Mirva Naturel d'al lec'h ma kresk an niver brasañ a foeon.

Ar Mirva Naturel zo 1,53 hektar dezhañ e lodenn reter an enezenn Sant Nikolaz. An douaroù zo bet prenet gant Kuzul Departamant Penn-ar-Bed. Abaoe 1977, un amregad-gwarez zo bet staliet tro-dro war Sant Nikolaz ha war an enezennigoù tost : **ar Bez, al Leue hag ar Bruneg**.

Resisaet e vo deziad ar veaj war-dro teir sizhun a-raok. Ret e vo eta en em ragenskrivañ a-benn bezañ kelaouet e poent. Kasit pep a un adres postel da glenan2018@skoluhelarvro.bzh. Kerkent ha ma vo Bruno FERRÉ, rener ar mirva, diarvar war mare ar bleuniadur, war an amzer ha war neuzioù ar mor, e kaso keloù. Resisaet e vo diouzhtu an deziad da vat d'ar re o do roet o adresoù. Ret e vo da bep hini, hep gortoz re bell, en emskrivañ da virout ur plas er vag ouzh Burev Les Vedettes de l'Odet 02.98.57.00.58.

Da zeiz ar veaj, soñjit mat erruout tri c'hardeur pe muioc'h a-raok eur al loc'hañ evit kaout amzer da vont da gemer ho pilhejoù ha da gaout ur plas mat er vag.

Mont da Enez Sant Nikolaz : un eurvezh ma vez brav an amzer. Dont en-dro : un eurvezh c'hoazh. Pourmen war an enezenn : div eurvezh. Moien 'vo d'ar re diaes dezho bale ha d'ar vugale vihan ober an droiad hep poan : ur wenodenn e koad zo bet lakaet war an tuniennoù ha n'eo ket gwall-hir tro an enezenn, ken bihan ma'z eo.

Soñjit ervat emwiskañ diouzh an amzer : botoù bale, dilhad ouzh an avel hag ouzh ar glav, lunedoù ha togoù ouzh an heol, diouzh ezhomm ha degasit ganeoc'h gevellunedoù ha peadra da denañ skeudennoù.

Skol-Uhel ar Vro - Institut culturel de Bretagne

Ti ar Vro - 3, straed al Lezenn - rue de la Loi
56000 GWENED - VANNES
☎ : 02-97-68-31-10

SIRET : 327 309 068 00051
✉ : icb@skoluhelarvro.bzh - <https://www.skoluhelarvro.bzh>
<https://www.facebook.com/institutculturel.debretagne>

Titouroù :

- diwar-benn ar foeon hag ar mirva :

<http://www.bretagne-vivante.org/Agir-ensemble/Nos-reserves-naturelles/Reserve-Naturelle-Nationale-Saint-Nicolas-des-Glenan>

- diwar-benn deiz hag eur an treizh (euriadoù 2017) :

<http://www.vedettes-odet.com/wp-content/uploads/2017/03/Glenan-horaires-2017.pdf>

Priz (2017, tud a oad gour) : 38€.

Bugale 4-12 vloaz : 17 €

Bugale yaouankoc'h : 7 €